

॥ तैत्तिरीय संहिता ॥

॥ चतुर्थः प्रश्नः ॥

॥ तैत्तिरीयसंहितायां द्वितीयकाण्डे चतुर्थः प्रश्नः ॥

देवा मनुष्याः पितरस्तेऽन्यत आसन्नसुरा रक्षांसि
 पिशाचास्तेऽन्यतस्तेषां देवानामुत यदल्पं लोहितमकुर्वन्तद्रक्षांसि
 रात्रीभिरसुभ्रन्तान्सुब्धान्मृतानभि व्यौच्छ्रुते देवा अविदुर्यो वै
 नोऽयमिप्रियते रक्षांसि वा इमं घ्नन्तीति ते रक्षांस्युपामन्त्रयन्त
 तान्यब्रुवन्वरं वृणामहे यत् (१)

असुराञ्जयाम् तन्नः सहासदिति ततो वै देवा असुरानजयन्ते-
 ऽसुराञ्जित्वा रक्षांस्युपानुदन्त तानि रक्षांस्यनृतमकर्तेति समन्तं
 देवान्पर्यविशन्ते देवा अग्रावनाथन्त तेऽग्नये प्रवन्ते पुरोडाशमष्टा-
 कपालं निर्वपन्नग्नये विबाधवन्तेऽग्नये प्रतीकवन्ते यदग्नये प्रवन्ते
 निर्वपन् यान्येव पुरस्ताद्रक्षांसि (२)

आसन्तानि तेन प्राणुदन्त यदग्नये विबाधवन्ते यान्येवाभितो
 रक्षांस्युपानुदन्त तेन व्यबाधन्त यदग्नये प्रतीकवन्ते यान्येव
 पश्चाद्रक्षांस्युपानुदन्त तेनापानुदन्त ततो वै देवा अभवन्परासुरा
 यो भ्रातृव्यवान्स्यात्स स्पर्धमान एतयेष्ट्या यजेताग्नये प्रवन्ते
 पुरोडाशमष्टाकपालं निर्वपेदग्नये विबाधवन्ते (३)

अ॒ग्नये॑ प्रती॑कवते॒ यद॒ग्नये॑ प्रव॑ते निर्व॑पति॒ य ए॒वास्मा॑-
च्छे॒यान्भ्रातृ॑व्य॒स्तं तेन॑ प्र णु॑दते॒ यद॒ग्नये॑ विबा॑धवते॒ य ए॒वैनैन॑
स॒दृङ्गं॑ तेन॒ वि बा॑धते॒ यद॒ग्नये॑ प्रती॑कवते॒ य ए॒वास्मा॑त्पापी॒यान्तं॑
तेनाप॑ नुदते॒ प्र श्रेया॑ःस॒म्भ्रातृ॑व्यं नुद॑तेऽति॒ स॒दृशं॑ कामति॒
नैन॑म्पापी॒यानाप्रो॑ति॒ य ए॒वं वि॒द्वाने॒तयेष्ट्या॑ यज॑ते॥ (४)

वृणा॑महे॒ यत्पु॑रस्ता॒द्रक्षा॑सि॒ वपे॑द॒ग्नये॑ विबा॑धवत॒ एवं च॒त्वारि॑ च॥ [१]

दे॒वा॒सुराः॑ संय॑न्ता आस॒न्ते दे॒वा अ॑ब्रुवन् यो नो॑
वी॒र्या॑वत्तम॒स्तमनु॑ स॒मार॑भामहा॒ इति॑ त इन्द्र॑मब्रुव॒न्त्वं वै
नो॑ वी॒र्या॑वत्तमोऽसि॒ त्वामनु॑ स॒मार॑भामहा॒ इति॑ सोऽब्र॑वीत्तिस्रो मं
इ॒मास्त॑नुवो॑ वी॒र्या॑वती॒स्ताः प्री॑णी॒ताथासु॑रान॒भि भ॑विष्य॒थेति॑ ता वै
ब्रू॒हीत्य॑ब्रुवन्नि॒यम॑ः॒होमु॑गि॒यं वि॑मृ॒धेय॑मिन्द्रि॒याव॑ती (५)

इत्य॑ब्रवीत्त॒ इन्द्रा॑या॒ःहोमु॑चे॒ पुरो॑डाशमेका॑दशकपालं
नि॒रव॑पन्निन्द्रा॒य वैमृ॑धायेन्द्रा॒येन्द्रि॒याव॑ते॒ यदिन्द्रा॑या॒ःहोमु॑चे॒
नि॒रव॑पन्न॒ःहंस॑ ए॒व तेना॑मुच्यन्त॒ यदिन्द्रा॑य॒ वैमृ॑धाय॒ मृधं॑
ए॒व तेना॑पा॒घ्नत॑ यदिन्द्रा॒येन्द्रि॒याव॑त॒ इन्द्रि॒यमे॒व तेना॑त्मन्न॑दधत॒
त्रय॑स्त्रि॒ःशत्क॑पालं॒ पुरो॑डाशं॒ नि॒रव॑पन्नय॑स्त्रि॒ःशद्वै॑ दे॒वता॑स्ता॒ इन्द्रं॑
आ॒त्मन्न॑नु॒ स॒मार॑म्भयत् भू॒त्यै (६)

तां वाव॑ दे॒वा विजि॑तिमुत्त॒माम॑सुरै॒र्व्यज॑यन्त॒ यो
भ्रातृ॑व्यवा॒न्थस्या॑त्स॒ स्पर्ध॑मान॒ एत॑येष्ट्या॒ यजे॑तेन्द्रा॒याःहोमु॑चे॒

पुरोडाशमेकादशकपालं निर्वपेदिन्द्राय वैमृधायेन्द्रायेन्द्रियावते-
 ऽहंसा वा एष गृहीतो यस्माच्छ्रेयान्भ्रातृव्यो यदिन्द्रायाहोमुचे
 निर्वपत्यहंस एव तेन मुच्यते मृधा वा एषोऽभिषण्णो
 यस्मात्समानेष्वन्यः श्रेयानुत (७)

अभ्रातृव्यो यदिन्द्राय वैमृधाय मृध एव तेनाप हते
 यदिन्द्रायेन्द्रियावत इन्द्रियमेव तेनात्मन्धत्ते त्रयस्त्रिंशत्कपालं
 पुरोडाशं निर्वपति त्रयस्त्रिंशद्वै देवतास्ता एव यजमान
 आत्मन्ननु समारम्भयते भूत्यै सा वा एषा विजितिर्नामेष्टिर्य
 एवं विद्वानेतयेष्ट्या यजत उत्तमामेव विजितिम्भ्रातृव्येण वि-
 जयते॥ (८)

इन्द्रियावती भूत्या उत्तैकान्नपञ्चाशच्च॥ [२]

देवासुराः संयत्ता आसन्तेषां गायत्र्योजो बलमिन्द्रियं
 वीर्यं प्रजां पशून्संगृह्यादायापक्रम्यातिष्ठत्तेऽमन्यन्त यतरान् वा
 इयमुपावर्त्स्यति त इदम्भविष्यन्तीति तां व्यह्वयन्त विश्वकर्मन्निति
 देवा दाभीत्यसुराः सा नान्यतराश्च नोपावर्तत ते देवा
 एतद्यजुरपश्यन्नोजोऽसि सहोऽसि बलमसि (९)

भ्राजोऽसि देवानां धाम नामासि विश्वमसि विश्वायुः सर्वमसि
 सर्वायुरभिभूरिति वाव देवा असुराणामोजो बलमिन्द्रियं वीर्यं
 प्रजां पशून्वृञ्जत यद्गायत्र्यपक्रम्यातिष्ठत्तस्मादेतां गायत्रीतीष्टिमाहुः

संवत्सरो वै गायत्री संवत्सरो वै तदपक्रम्यातिष्ठद्यदेतया देवा
असुराणामोजो बलमिन्द्रियं वीर्यम् (१०)

प्रजां पशूनवृञ्जत तस्मादेताः संवर्ग इतीष्टिमाहुर्यो
भ्रातृव्यवान्स्यात्स स्पर्धमान एतयेष्ट्या यजेताग्रये संवर्गाय
पुरोडाशमष्टाकपालं निर्वपेत्तः श्रुतमासन्नमेतेन यजुषाभि मृशेदोज
एव बलमिन्द्रियं वीर्यं प्रजां पशून्भ्रातृव्यस्य वृङ्क्ते भवत्यात्मना
परास्य भ्रातृव्यो भवति॥ (११)

बलमस्येतया देवा असुराणामोजो बलमिन्द्रियं वीर्यं पञ्चत्वारिंशच्च॥ [३]

प्रजापतिः प्रजा असृजत ता अस्मात्सृष्टाः पराचीरायन्ता
यत्रावसन्ततो गर्मुदुदतिष्ठत्ता बृहस्पतिश्चान्ववैताः सो
ऽब्रवीद्बृहस्पतिरनया त्वा प्र तिष्ठान्यथ त्वा प्रजा उपावत्स्यन्तीति
तम्प्रातिष्ठत्तो वै प्रजापतिं प्रजा उपावर्तन्त यः प्रजाकामः
स्यात्तस्मा एतम्प्राजापत्यं गर्मुतं चरुं निर्वपेत्प्रजापतिम् (१२)

एव स्वेन भागधेयेनोप धावति स एवास्मै प्रजाम्प्र जनयति
प्रजापतिः पशूनसृजत तैः अस्मात्सृष्टाः पराश्च आयन्ते यत्रावसन्ततो
गर्मुदुदतिष्ठत्तान्पूषा चान्ववैताः सोऽब्रवीत्पूषानया मा प्र तिष्ठान्यथ
त्वा पशवं उपावत्स्यन्तीति माम्प्र तिष्ठेति सोमोऽब्रवीन्मम वै (१३)

अकृष्टपच्यमित्युभौ वाम्प्र तिष्ठानीत्यब्रवीत्तौ प्रातिष्ठत्तो
वै प्रजापतिम्पशवं उपावर्तन्त यः पशुकामः स्यात्तस्मा एतः

सोमापौष्णं गार्मुतं चरुं निर्वपेत्सोमापूषणावेव स्वेन भागधेयेनोप
धावति तावेवास्मै पशून्प्रजनयतः सोमो वै रेतोधाः पूषा
पशूनाम्प्रजनयिता सोम एवास्मै रेतो दधाति पूषा पशून्प्र
जनयति॥ (१४)

वपेत्प्रजापतिं वै दधाति पूषा त्रीणि च॥ [४]

अग्ने गोभिर्न आ गृहीन्दो पुष्ट्या जुषस्व नः। इन्द्रो धर्ता
गृहेषु नः॥ सविता यः सहस्रियः स नो गृहेषु रारणत्। आ पूषा
एत्वा वसु॥ धाता ददातु नो रयिमीशानो जगतस्पतिः। स नः
पूर्णेन वावनत्॥ त्वष्टा यो वृषभो वृषा स नो गृहेषु रारणत्।
सहस्रेणायुतेन च॥ येन देवा अमृतम् (१५)

दीर्घं श्रवो दिव्यैरयन्त। रायस्पोष त्वमस्मभ्यं गवां कुल्मिं
जीवसु आ युवस्व। अग्निर्गृहपतिः सोमो विश्ववर्निः सविता
सुमेधाः स्वाहा॥ अग्ने गृहपते यस्ते घृत्यो भागस्तेन सह
ओज आक्रममाणाय धेहि श्रेष्ठपात्पथो मा योषं मूर्धा भूयासु
स्वाहा॥ (१६)

अमृतमष्टात्रिंशच्च॥ [५]

चित्रया यजेत पशुकाम इयं वै चित्रा यद्वा अस्यां विश्वं
भूतमधि प्रजायते तेनेयं चित्रा य एवं विद्वाश्चित्रया पशुकामो

यजन्ते प्र प्रजयां पशुभिर्मिथुनैर्जायते प्रैवाग्नेयेन वापयति रेतः
सौम्येन दधाति रेत एव हितं त्वष्टा रूपाणि वि करोति सारस्वतौ
भवत एतद्वै दैव्यमिथुनं दैव्यमेवास्मै" (१७)

मिथुनम्मध्यतो दधाति पुष्ट्यै प्रजननाय सिनीवाल्यै
चरुर्भवति वाग्वै सिनीवाली पुष्टिः खलु वै वाक्पुष्टिमेव
वाचमुपैत्यैन्द्र उत्तमो भवति तेनैव तन्मिथुनं सप्तैतानि
हवींषि भवन्ति सप्त ग्राम्याः पशवः सप्तारण्याः सप्त
छन्दांस्युभयस्यावरुद्धा अथैता आहुतीर्जुहोत्येते वै देवाः
पुष्टिपतयस्त एवास्मिन्पुष्टिं दधति पुष्यति प्रजयां पशुभिरथो
यदेता आहुतीर्जुहोति प्रतिष्ठित्यै॥ (१८)

अस्मै त एव द्वादश च॥

[६]

मारुतमसि मरुतामोजोऽपां धारां भिन्द्ध रमयंत
मरुतः श्येनमायिनम्मनोजवसं वृषणं सुवृक्तिम्। येन
शर्ध उग्रमवसृष्टमेति तदश्विना परि धत्तं स्वस्ति।
पुरोवातो वर्षञ्जिन्वरावृथ्स्वाहा वातावद्वर्षन्नुग्ररावृथ्स्वाहा
स्तनयन्वर्षन्भीमरावृथ्स्वाहानशन्यवस्फूर्जन्दिद्युद्वर्षन्त्वेषरावृथ्स्वाहा
वर्षन्पृतिरावृत् (१९)

स्वाहा बहु हायमवृषादिति श्रुतरावृथ्स्वाहातपति

वर्षन्विराडावृथ्स्वाहावस्फूर्जन्दिद्युद्वर्षन्भूतरावृथ्स्वाहा मान्दा
 वाशाः शुन्यूरजिराः। ज्योतिष्मतीस्तमस्वरीरुन्दतीः सुफेनाः।
 मित्रभृतः क्षत्रभृतः सुराष्ट्रा इह माऽवत। वृष्णो अश्वस्य संदानमसि
 वृष्ट्यै त्वोप नह्यामि॥ (२०)

पूर्तिरावृद्धिचत्वारिंशच्च॥ [७]

देवा वसव्या अग्ने सोम सूर्य। देवाः शर्मण्या मित्रावरुणार्यमन्त्र।
 देवाः सपीतयोऽपा नपादाशुहेमन्त्र। उद्रो दत्तोऽदधिम्भिन्त दिवः
 पर्जन्यादन्तरिक्षात्पृथिव्यास्ततो नो वृष्ट्याऽवत। दिवा चित्तमः
 कृण्वन्ति पर्जन्येनोदवाहेन। पृथिवीं यद्बहुन्दन्ति। आ यं नरः
 सुदानवो ददाशुषे दिवः कोशमचुच्यवुः। वि पर्जन्याः सृजन्ति
 रोदसी अनु धन्वना यन्ति (२१)

वृष्टयः। उदीरयथा मरुतः समुद्रतो यूयं वृष्टिं वरषयथा
 पुरीषिणः। न वो दस्त्रा उप दस्यन्ति धेनवः शुभं यातामनु रथा
 अवृत्सत। सृजा वृष्टिं दिव आद्भिः समुद्रं पृण। अञ्जा असि
 प्रथमजा बलमसि समुद्रियम्। उन्नम्भय पृथिवीम्भिन्द्धीदं दिव्यं
 नभः। उद्रो दिव्यस्य नो देहीशानो वि सृजा दृतिम्। ये देवा
 दिविभागा येऽन्तरिक्षभागा ये पृथिविभागाः। त इमं यज्ञमवन्तु
 त इदं क्षेत्रमा विंशन्तु त इदं क्षेत्रमनु वि विंशन्तु॥ (२२)

यन्ति देवा विंशतिश्च॥ [८]

मा॒रु॒तम॑सि॒ म॒रु॒ता॒मो॒ज॒ इति॑ कृष्णं वासः कृष्णतूषं परि॑ धत्त
 ए॒तद्वै वृ॒ष्ट्यै॑ रू॒प॑ स॒रूप॑ ए॒व भू॒त्वा प॒र्जन्यं॑ व॒र्षय॑ति र॒मय॑त
 म॒रुतः॑ श्ये॒नमा॒यि॒नमि॑ति॒ पश्चा॑द्वा॒तं प्र॑ति॒ मी॒वति॑ पु॒रोवा॑तमे॒व
 ज॑नयति व॒र्षस्या॑व॒रुद्धौ॑ वा॒तना॒मानि॑ जु॒होति॑ वा॒युर्वै वृ॒ष्ट्या॑
 ई॒शे वा॒युमे॒व स्वे॒न भा॒ग॒धेये॒नोप॑ धावति॒ स ए॒वास्मै॑ प॒र्जन्यं॑
 व॒र्षय॑त्य॒ष्टौ (२३)

जु॒होति॑ च॒तस्रो॑ वै दि॒शश्च॑त॒स्रोऽवा॑न्तरदि॒शा दि॒ग्भ्य ए॒व
 वृ॒ष्टिः॑ स॒म्प्र च्या॑वयति कृष्णाजि॒ने सं यौ॑ति ह॒विरे॒वाक॑रन्तर्वे॒दि
 सं यौ॒त्यव॑रुद्धौ॒ यती॑नाम॒द्यमा॑नाना॑ शी॒र्षाणि॑ प॒राप॑त॒न्ते ख॒र्जूरा॑
 अ॒भव॑न्तेषा॑ र॒स ऊ॒र्ध्वोऽप॑त॒त्तानि॑ क॒रीरा॑ण्य॒भवन्त्सौ॑म्यानि॒
 वै क॒रीरा॑णि सौ॒म्या ख॒लु वा आ॑हु॒तिर्दि॒वो वृ॒ष्टिं च्या॑वयति॒
 यत्क॒रीरा॑णि भ॒वन्ति॑ (२४)

सौ॒म्यये॒वाहु॑त्या दि॒वो वृ॒ष्टि॒मव॑ रुन्धे मधु॑षा सं यौ॒त्यपां॑
 वा ए॒ष ओष॑धीना॒ रसो॑ यन्मध्व॒द्ध्य ए॒वौष॑धीभ्यो व॒र्षत्य॑थो
 अ॒द्ध्य ए॒वौष॑धीभ्यो वृ॒ष्टिं नि॑ न॒यति॑ मा॒न्दा वा॑शा इति सं
 यौ॑ति नाम॒धेयै॑रे॒वैना॑ अ॒च्छैत्य॑थो यथा॑ ब्रूयादसा॒वेही॑त्ये॒वमे॒वैना॑
 नाम॒धेयै॑रा (२५)

च्या॒वय॑ति वृष्णो अश्व॑स्य सं॒दान॑म॒सि वृ॒ष्ट्यै त्वोप॑
 नह्या॒मीत्या॑ह वृषा वा अश्वो वृषा प॒र्जन्यः॑ कृष्ण इ॒व ख॒लु वै

भूत्वा व॑र्षति रू॒पेणै॒वैन॒ः सम॑र्धयति व॒र्षस्याव॑रुद्धौ॥ (२६)

अष्टौ भवन्ति नामधेयैरेकात्रिंशच्च॥ [९]

देवा॑ वसव्या॒ देवाः॑ शर्मण्या॒ देवाः॑ सपीतय॒ इत्या॑ ब॒ध्नाति॑
दे॒वता॑भिरे॒वान्व॑हं वृष्टि॑मिच्छति॒ यदि॑ व॒र्षेत्ताव॑त्ये॒व हो॑तव्यं॒ यदि॑ न
व॒र्षेच्छ्वो॑ भू॒ते ह॒विर्निर्व॑पेदहोरा॒त्रे वै मि॒त्रावरु॑णावहोरा॒त्राभ्यां॑ खलु
वै पर्जन्यो॑ व॒र्षति॑ नक्तं॒ वा हि॑ दिवा॑ वा॒ व॒र्षति॑ मि॒त्रावरु॑णावे॒व
स्वेन॑ भा॒गधे॒येनोप॑ धावति॒ तावे॒वास्मै॑ (२७)

अ॒होरा॒त्राभ्यां॑ पर्जन्यं॑ व॒र्षय॑तोऽग्नये॑ धाम॒च्छदे॑ पुरो॒डाश॑म॒ष्टा-
क॑पालं॒ निर्व॑पेन्मरु॒तः स॒प्तक॑पालः॒ सौर्य॑मेकं॒ कपाल॑म॒ग्निर्वा॑ इतो
वृष्टि॑मुदीरयति॒ मरु॑तः॒ सृष्टां॑ नयन्ति॒ यदा॑ खलु॒ वा अ॒सावा॑दित्यो
न्यङ्ग॑श्मिभिः॒ पर्या॑वर्ततेऽथ॑ व॒र्षति॑ धाम॒च्छदि॑व॒ खलु॒ वै भू॒त्वा
व॑र्षत्ये॒ता वै दे॒वता॑ वृष्ट्या॑ ईशते॒ ता ए॒व स्वेन॑ भा॒गधे॒येनोप॑
धावति॒ ताः (२८)

ए॒वास्मै॑ पर्जन्यं॑ व॒र्षय॑न्त्यु॒ताव॑र्षिष्यन्व॒र्षत्ये॒व सृ॒जा
वृष्टिं॑ दि॒व आ॒द्भिः स॑मु॒द्रं पृ॒णेत्या॑हेमाश्चै॒वामू॒श्चापः॑ स॒मर्ध॑यत्यथो॑
आ॒भिरे॒वामू॒रच्छै॑त्य॒ज्जा अ॑सि प्रथम॒जा बल॑मसि॒ समु॒द्रिय॑मित्या॒ह
यथा॑य॒जुरे॒वैतदु॒न्न॑म्भय॒ पृथि॒वीमि॑ति॒ व॒र्षाह्वां जु॑होत्येषा॒ वा
ओष॑धीनां॒ वृष्टि॑वनिस्तये॒व वृष्टि॑मा च्या॒वय॑ति॒ ये दे॒वा दि॒विभा॑गा
इति॑ कृष्णाजि॒नम॑व॒ धू॒नोती॑म॒ एवास्मै॑ लो॒काः प्री॒ता अ॒भीष्टा॑

भवन्ति॥ (२९)

अस्मै धावति ता वा एकविंशतिश्च॥ [१०]

सर्वाणि छन्दाः स्येतस्यामिष्ट्यामनूच्यानीत्याहुस्त्रिष्टुभो वा
एतद्वीर्यं यत्कुदुष्णिहा जगत्यै यदुष्णिहककुभावन्वाह तेनैव
सर्वाणि छन्दाः स्यव रुन्धे गायत्री वा एषा यदुष्णिहा यानि
चत्वार्यध्यक्षराणि चतुष्पाद एव ते पशवो यथा पुरोडाशे
पुरोडाशोऽध्येवमेव तद्यद्व्यध्यक्षराणि यज्जगत्या (३०)

परिदध्यादन्तं यज्ञं गमयेत्त्रिष्टुभा परि दधातीन्द्रियं वै वीर्यं
त्रिष्टुगिन्द्रिय एव वीर्यं यज्ञं प्रतिं ष्ठापयति नान्तं गमयत्यग्रे त्री
ते वाजिना त्री षधस्थेति त्रिवत्या परि दधाति सरूपत्वायु सर्वो
वा एष यज्ञो यत्रैधातवीयं कामायकामाय प्र युज्यते सर्वेभ्यो हि
कामेभ्यो यज्ञः प्रयुज्यते त्रैधातवीयेन यजेताभिचरन्सर्वो वै (३१)

एष यज्ञो यत्रैधातवीयः सर्वेणैवैनं यज्ञेनाभि चरति स्तृणुत
एवैनमेतयैव यजेताभिचर्यमाणः सर्वो वा एष यज्ञो यत्रैधातवीयः
सर्वेणैव यज्ञेन यजते नैनमभिचरन्स्तृणुत एतयैव यजेत सहस्रेण
यक्ष्यमाणः प्रजातमेवैनद्वदात्येतयैव यजेत सहस्रेणेजानोऽन्तं वा
एष पशूनां गच्छति (३२)

यः सहस्रेण यजते प्रजापतिः खलु वै पशून्सृजत ताः

स्रैधातवीयेनैवासृजत य एवं विद्वाः स्रैधातवीयेन पशुकांमो यजते
 यस्मादेव योनेः प्रजापतिः पशूनसृजत तस्मादेवैनान्त्सृजत
 उपैनमुत्तरं सहस्रं नमति देवताभ्यो वा एष आ वृश्च्यते यो यक्ष्य
 इत्युक्त्वा न यजते त्रैधातवीयेन यजेत सर्वो वा एष यज्ञः (३३)

यत्रैधातवीयः सर्वेणैव यज्ञेन यजते न देवताभ्य आ वृश्च्यते
 द्वादशकपालः पुरोडाशो भवति ते त्रयश्चतुष्कपालास्त्रिः षमृद्धत्वाय
 त्रयः पुरोडाशा भवन्ति त्रय इमे लोका एषां लोकानामाप्त्या
 उत्तरउत्तरो ज्यायान्भवत्येवमिव हीमे लोका यवमयो मध्य एतद्वा
 अन्तरिक्षस्य रूपः समृद्धौ सर्वेषामभिगमयन्नव द्यत्यछम्बद्वारः
 हिरण्यं ददाति तेज एव (३४)

अव रुन्धे तार्प्यं ददाति पशूनेवाव रुन्धे धेनुं ददात्याशिषं
 एवाव रुन्धे साम्नो वा एष वर्णो यद्धिरण्यं यजुषां तार्प्यमुक्थामदानां
 धेनुरेतानेव सर्वान् वर्णानव रुन्धे॥ (३५)

जगत्याऽभिचरन्सर्वो वै गच्छति यज्ञस्तेज एव त्रिःशब्दः॥ [११]

त्वष्टा हतपुत्रो वीन्द्रः सोममाहरत्तस्मिन्निन्द्र उपहवमैच्छत
 तं नोपाह्वयत पुत्रम्मेऽवधीरिति स यज्ञवेशसं कृत्वा
 प्रासहा सोममपिबत्तस्य यदत्यशिष्यत तत्त्वष्टाहवनीयमुप
 प्रावर्तयत्स्वाहेन्द्रशत्रुर्वर्धस्वेति स यावदूर्ध्वः पराविध्यति तावति
 स्वयमेव व्यरमत यदि वा तावत्प्रवणम् (३६)

आसीद्यदि वा तावदध्यग्रेरासीत्स सम्भवन्नग्रीषोमावभि
समभवत्स इषुमात्रमिषुमात्रं विष्वङ्बुवर्धत स इमाल्लोकानवृणोद्यदिमाल्ल
वृत्रत्वन्तस्मादिन्द्रोऽबिभेदपि त्वष्टा तस्मै त्वष्टा वज्रमसिञ्चत्तपो वै
स वज्रं आसीत्तमुद्यन्तुं नाशक्रोदथ वै तर्हि विष्णुः (३७)

अन्या देवतासीत्सोऽब्रवीद्विष्णवेहीदमा हरिष्यावो
येनायमिदमिति स विष्णुस्त्रेधात्मानं वि न्यधत्त पृथिव्यां
तृतीयमन्तरिक्षे तृतीयं दिवि तृतीयमभिपर्यावर्ताद्यबिभेद्यत्पृथिव्यां
तृतीयमासीत्तेनेन्द्रो वज्रमुदयच्छद्विष्ण्वनुस्थितः सोऽब्रवीन्मा मे प्र
हारस्ति वा इदम् (३८)

मयि वीर्यं तत्ते प्र दास्यामीति तदस्मै प्रायच्छत्तत्प्रत्यंगृह्णादधा
मेति तद्विष्णवेति प्रायच्छत्तद्विष्णुः प्रत्यंगृह्णादस्मास्विन्द्रं इन्द्रियं
दधात्विति यदन्तरिक्षे तृतीयमासीत्तेनेन्द्रो वज्रमुदयच्छद्विष्ण्वनुस्थितः
सोऽब्रवीन्मा मे प्र हारस्ति वा इदम् (३९)

मयि वीर्यं तत्ते प्र दास्यामीति तदस्मै प्रायच्छत्तत्प्रत्यंगृह्णाद्विर्माधा
इति तद्विष्णवेति प्रायच्छत्तद्विष्णुः प्रत्यंगृह्णादस्मास्विन्द्रं इन्द्रियं
दधात्विति यद्विद्वि तृतीयमासीत्तेनेन्द्रो वज्रमुदयच्छद्विष्ण्वनुस्थितः
सोऽब्रवीन्मा मे प्र हार्येनाहम् (४०)

इदमस्मि तत्ते प्र दास्यामीति त्वी (३) इत्यब्रवीत्सन्धान्तु
सं दधावहै त्वामेव प्र विशानीति यन्माम्प्रविशेः किम्मा भुञ्ज्या

इत्य॑ब्रवी॒त्वामे॒वेन्धी॑य॒ तव॒ भोगा॑य॒ त्वाम्प्र॒ विंशे॑य॒मित्य॑ब्रवी॒त्तं वृ॒त्रः
प्रावि॑शदु॒दरं॒ वै वृ॒त्रः क्षु॒त्खलु॒ वै म॑नु॒ष्यस्य॒ भ्रातृ॑व्यो॒ यः (४१)

ए॒वं वेद॑ हन्ति॒ क्षुध॑म्भ्रातृ॒व्यन्त॑दस्मै॒ प्राय॑च्छ॒त्तत्प्रत्य॑गृ॒ह्णात्रि॑मा॒धा
इति॑ तद्विष्णु॒वेति॑ प्राय॑च्छ॒त्तद्विष्णुः॑ प्रत्य॑गृ॒ह्णाद॒स्मास्विन्द्र॑ इन्द्रि॒यं
द॒धात्विति॑ यत्रिः॒ प्राय॑च्छ॒त्रिः॒ प्रत्य॑गृ॒ह्णात्तत्रि॑धातो॑स्त्रिधातु॒त्वं
यद्विष्णु॑र॒न्वति॑ष्ठत् विष्णु॒वेति॑ प्राय॑च्छ॒त्तस्मा॑दैन्द्रावैष्ण॒वः ह॒विर्भव॑ति
यद्वा इ॒दं किं॒ च तद॑स्मै॒ तत्प्राय॑च्छ॒दृचः॑ सामा॑नि॒ यजूं॑षि स॒हस्रं॑
वा अ॒स्मै तत्प्राय॑च्छ॒त्तस्मा॑त्स॒हस्रं॑दक्षिणम्॥ (४२)

प्र॒वणं॑ विष्णु॒र्वा इ॒दमि॒दम॒हं यो भ॑वत्येकं वि॒शतिश्च॥ [१२]

दे॒वा वै रा॑ज॒न्याञ्जा॑य॒माना॑दबिभयुस्तम॒न्तरे॒व सन्तं॑
दाम्ना॑पौ॒म्भन्त्स॒ वा ए॒षोऽपौ॑ब्धो जायते॒ यद्रा॑ज॒न्यो यद्वा ए॒षो-
ऽन॑पोब्धो जायेत वृ॒त्रान्ध्रः॑ श्व॒रेद्यं॑ का॒मये॑त रा॒ज॒न्यम॑न॒पोब्धो जायेत॑
वृ॒त्रान्ध्रः॑ श्व॒रेदिति॑ तस्मा॑ ए॒तमै॑न्द्रा॒बाह॑स्प॒त्यं च॒रुं निर्व॑पेदैन्द्रो वै
रा॑ज॒न्यो ब्र॒ह्म बृ॒हस्प॑तिर्ब्रह्म॒णैवैनं॑ दाम्नो॒ऽपो॒म्भना॑न्मुञ्चति॒ हिर॑ण्मयं
दाम् दक्षि॑णा सा॒क्षादे॒वैनं॑ दाम्नो॒ऽपो॒म्भना॑न्मुञ्चति॥ (४३)

ए॒नं द्वाद॑श च॥ [१३]

नवो॑नवो भवति॒ जाय॑मा॒नोऽह्ना॑ के॒तुरु॑षसा॒मेत्य॑ग्रे॑। भा॒गं
दे॒वेभ्यो॑ वि द॒धात्या॑यन् चन्द्र॒मास्ति॑रति दी॒र्घमा॑युः। यमा॑दित्या
अ॒शुमा॑प्या॒यय॑न्ति॒ यम॑क्षित॒मक्षि॑तयः पिब॑न्ति। तेन॑ नो

राजा वरुणो बृहस्पतिरा प्याययन्तु भुवनस्य गोपाः। प्राच्यां
दिशि त्वमिन्द्रासि राजोतोदीच्यां वृत्रहन्वृत्रहासि। यत्र यन्ति
स्रोत्यास्तत् (४४)

जितं ते दक्षिणतो वृषभ एधि हव्यः। इन्द्रो जयाति न परां
जयाता अधिराजो राजसु राजयाति। विश्वा हि भूयाः पृतना
अभिष्टीरुपसद्यो नमस्यो यथासत्। अस्येदेव प्र रिरिचे महित्वं
दिवः पृथिव्याः पर्यन्तरिक्षात्। स्वराडिन्द्रो दम् आ विश्वगूर्तः
स्वरिरमन्त्रो ववक्षे रणाय। अभि त्वा शूर नोनुमोऽदुग्धा इव धेनवः।
ईशानम् (४५)

अस्य जगतः सुवर्दशमीशानमिन्द्र तस्थुषः। त्वामिद्धि
हवामहे साता वाजस्य कारवः। त्वां वृत्रेष्विन्द्र सत्पतिं नरस्त्वां
काष्ठास्वर्वतः। यद्वाव इन्द्र ते शतं शतं भूमोरुत स्युः। न त्वां
वज्रिन्सहस्रं सूर्या अनु न जातमष्ट रोदसी। पिबा सोममिन्द्र
मन्दतु त्वा यं ते सुषाव हर्यश्वाद्रिः। (४६)

सोतुर्बाहुभ्यां सुयतो नार्वी। रेवतीर्नः सधमाद इन्द्रे सन्तु
तुविवाजाः। क्षुमन्तो याभिर्मदेम। उदग्ने शुचयस्तव वि ज्योतिषोदु
त्यं जातवेदसं सप्त त्वा हरितो रथे वहन्ति देव सूर्य। शोचिष्केशं
विचक्षण। चित्रं देवानामुदगादनीकं चक्षुर्मित्रस्य वरुणस्याग्नेः। आ-
ऽप्रा द्यावापृथिवी अन्तरिक्षं सूर्य आत्मा जगतस्तस्थुषः (४७)

च। विश्वे देवा ऋतावृधं ऋतुभिर्हवनश्रुतः। जुषन्तां
 युज्यम्पयः। विश्वे देवाः शृणुतेमं हवम्मे ये अन्तरिक्षे य उप
 द्यवि ष्ट। ये अग्निजिह्वा उत वा यजत्रा आसद्यास्मिन्बर्हिषि
 मादयध्वम् (४८)

देवा मनुष्या देवासुरा अब्रुवन्देवासुरास्तेषां ज्ञायत्री प्रजापतिस्ता यत्राग्ने गोभिश्चित्रया मारुतन्देवां
 वसव्या अग्ने मारुतमिति देवां वसव्या देवाः शर्मण्यास्त्वष्टां हतपुत्रो देवा वै राजन्यान्नवौनवश्चतुर्दश॥ [१४]

[देवा मनुष्याः प्रजां पशून्देवां वसव्याः परिदध्यादिदमस्म्यष्टाचत्वारिंशत्॥४८॥ देवा मनुष्यां
 मादयध्वम्॥]

This PDF was downloaded from <http://stotrasamhita.github.io>.

GitHub: <http://stotrasamhita.github.io> | <http://github.com/stotrasamhita>

Credits: <http://stotrasamhita.github.io/about/>